

17

2614

43
2860

ADVIS AV ROY.

SVR LA

REFORMATION


GENERALE DES ABVS

QVI SE COMMETTENT

en son Royaume.

2

M. DC. XIII.



Digitized by the Internet Archive
in 2010 with funding from
University of Ottawa

17

2614

43
2860

ADVIS AV ROY.

SVR LA

REFORMATION

GENERALE DES ABVS

QVI SE COMMETTENT

en son Royaume.

2

M. DC. XIII.

ADVIS A ROY

AT 178

RETOURNAISON

GENEVALE DES ABYS

QUI SE COMMETTENT

EN 1788

M. DE KILL

ADVIS AV ROY, SUR LA
reformation generale des abus qui se com-
mettent en son Royaume.

SIRE, Puis quel'Eglise vniuerselle vous a honoré du tiltre de Tres-Chrestien, tesmoignez luy à ceste heure le zele qu'avez non seulement de la conseruer, mais aussi de dissiper les nuages qui pourroient offusquer sa splendeur.

Plus sainctement vous ne pouuez luy faire paroistre vostre volonté, qu'en ceste generale Assemblée de vos subiets, qui pressez de miser es vous tendent les bras pour la manutention du culte diuin, le reestablisement de la Iustice, le soulagement du peuple, & le chastimēt des meschans: Meschans qui sont en si grand nombre en vostre France, qu'à la façon d'un ancien Empereur vous pourriez porter dans vn anneau les gens de bien qui y sont.

Le motif d'une telle rareté vient des Ecclesiastiques, lesquels au lieu de seruir de lumiere à vn chacun, & mener vne vie toute diuine, se iettent en Sardanapales es precipices de toutes sortes de vices.

Que vostre Majesté leur face obseruer le saint & sacré Concile de Trente, à sçauoir pour la detestation de l'auarice, l'eslongnement de la paillardise, la haine de la pluralité, vente, achapt, & confidence des Benefices. Alors elle verra comme d'une benediction plantureuse, que Dieu fera naistre es cœurs de vos François (quelques impies & heretiques qu'ils soient) le desir de se faire vrais Chrestiens & Catholiques, puis tant de vertus & commoditez, qu'ils s'eslouyront. C'est assez, c'est assez, Seigneur, nous sommes enflammés, d'en-

flammez bruslez, de bruslez consommez dans l'amour de tes bienfaicts.

COMMENCEZ donc par là, bon Roy, & confidez comme le Sceptre Royal ne vous a esté donné que sur la promesse de n'en estre ingrat enuers Dieu, luy ayant protesté par vœu solennel & public de le faire honorer, craindre & seruir par toutes les terres de vostre obeissance.

Les Anges qui fixement contemplent sa grandeur ne demandent autre chose, pour vous faire l'un des grands Roys qui iamais ayent esté, sinon que comme l'Eglise est la colonne de sa verité, le domicile de sa foy, & le temple de son immortalité, vous luy donniez des Sacrificateurs qui soient vrayement purs, & non menteurs à son saint Esprit (comme maintenant ils sont.) Chose qui causera la ruine totale de vostre Monarchie si n'y remediez.

Le Soleil n'illumineroit la terre si le Tout-puissant ne luy influoit sa lueur: L'œil ne iugeroit ce qui est bon au corps s'il ne voyoit ce qui est propre pour son aliment. Vous qui estes le vray soleil, l'œil & le corps de nostre France, comme voulez-vous qu'elle parroisse sur toutes les nations de ce monde, si à l'imitation du pieux Roy saint Louys vous ne donnez vn tel gouuernail aux Prestres, qu'à vostre exemple, & vous sur la leur, ne mettiez à vn heureux port de beatitude le nauire de cest Empire?

Les meilleures rames pour l'y pousser sont, de nommer les bons Ecclesiastiques aux Eueschez, Abbayes, & Priorez, non les Princes, Gentilshommes, Iuges, Financiers, Marchands & Huguenots: puis despoüiller les Cardinaux & autres Potentats de l'Eglise de la grande quantité de Benefices qu'ils ont, & les conférer à ceux qui par longues estudes & continuelles ver-

5
rus au rapport d'un chacun les auront meritez.

A I N S I faisant Dieu vous benira, les bien-heureux esprits le prieront pour vostre accroissement, & tout le peuple avec vous vsera la manne celeste.

A Q V E L L E raison, grand Roy, les heretiques & seculiers iouyront-ils des charges diuines, veu que Dieu par l'alliance derniere qu'il a faicte avec nous les en exclut? L'usage, l'experience, la Tradition, les Loix & Canons defendent qu'ils les exercent: Les Constitutions fondamentales de nostre vostre Royaume ne permettent qu'ils ayent à les posseder. Ostez ceste gangrene de ce corps Monarchique, afin qu'il ne vienne à estre corrompu, pourri, & reduit en cendres.

A Q V E L L E occasion aussi les Ecclesiastiques peuvent-ils auoir tant & tant de Benefices? Quand il leur est estroitement defendu, tant par l'ordre ancien du vieil Testament, que par l'Oracle mesme de la diuinité I E S V S- C H R I S T, les Apostres, & Conciles de son Espouse (i'entends l'Eglise.)

C' E S T là, c'est là où est le venin. Vsez comme l'Ange du grand Dieu viuant, del'angelique, pour empêcher que ce malheureux poison n'infecte dauantage les membres de cest Estat.

A V A N C E Z aux Dignitez Pontificales les vertueux & capables, & vous aurez vn Royaume de paix, vn Empire de gloire, vne Monarchie d'amour tout diuin, en laquelle comme vn Phoenix vers Heliopolis reuiurez sain & entier à toute eternité.

L E S anciens François, selon le tesmoignage des Historiens tant nostres qu'estrangers, ont esté anciennement accompagnez de cest heur, que d'auoir eu en leur Paganisme des Sacrificateurs (ie dis Druides) qui pullulans en toute sorte de vertus faisoient honte aux nations de leur siecle.

Dv depuis que le Soleil de Iustice IESVS-CHRIST a dardé les rayons de sa clemence sur nos Roys vos predecesseurs, pour (les retirant de la superstition paganesque) les esleuer à la vraye Religion, de quelle pureté & iustice ont-ils eu des Christs (i'appelle des Prestres) qui perpetuellement leur ont procuré la grace de Dieu?

CLAVIS sera tesmoin du bien-heureux saint Remy Euesque de Rheims, qui baptisant & sacrant ce bon Roy, engendra en son ame la pieté par laquelle il deuangoit tous ceux des Gaules. Ce furent, ce furent aussi les merites de ce bon Prelat ioints aux iournalieres supplications de la vertueuse Clotilde, qui conuièrent le Dieu de paix à appeller les François & leur Roy au Christianisme.

CHARLES l'Empereur-Roy des grands, & le grand des Empereurs-Roys, vous tesmoignera par les bons saints Arnould & Gilles, comme les Ecclesiastiques de son temps n'estoient que modeles, exemplaires, & prototypes de toutes saintetez.

S. LOVYs, celeste tige de vostre Royale Maison, s'escrierait avec le bon Roy Robert fils de Hues Capet, s'il pouuoit vous accompagner en ce Theatre, Theatre le plus releué de toutes les Monarchies, que leurs Prelats estoient les miroirs de charité, priere & deuotion. On ne les voyoit aux Cours des Princes affecter des honneurs & des richesses, sçachans & apprehendans les peines qu'ils souffriroient par le iuste iugement du Roy des Roys, si perpetuellemēt ils n'auoient l'œil sur les ames qu'il leur auoit donné en garde.

CHARLES le Victorieux avec quelle ambition, avec quel zele, avec quelle pureté se rendit-il le protecteur de la Pragmatique sanction? sinon afin que l'on n'esleust aux Prelatures de l'Eglise que des personnaiges totalement vnīs à Dieu.

L O V V S XI. de quelle probité & sanctimonie de vie a-il eu auprès de sa Majesté des Ecclesiastiques ? Chacun sçait, sans que ie tire du Ciel saint François de Paule, comme il a esté soucieux qu'en l'Eglise Gallicane on vist la vie des Ecclesiastiques autant admirable, voire plus, que celle des Intelligences celestes.

Ie dis plus admirable que celle des Anges: Car selon le dire du fameux Docteur de l'Eglise S. Augustin, les Prestres sont tant aimez de la Divinité, que le sacré Fils d'icelle s'inthronisant (sans se desthroniser du siege eternal de son estre) de nouveau il s'incarne dans leurs mains, & se lie en icelles comme dans le cloistre Virginal. Heureuse vn million de fois heureuse telle Dignité, puis qu'il plaist à Dieu qu'elle soit administree par des hommes, qui estans dans ceste mortalité vivent par œuvres dans le Ciel.

Ie dis dans le Ciel, d'autant qu'ils ont vne prééminence sur le reste des hommes, Cherubins, & autres puissances Angeliques.

A ce sujet ce bon Roy enuoyoit çà & là par les Terres estrangeres rechercher ceux qui reluisoient en toute integrité, & les faisoit reuerer en France, luy mesme commençant, comme la personne de Dieu. Honneur que Dieu commande leur estre deu, moyennant qu'ils soient tels qu'ils doiuent estre.

C O N S E C U T I V E M E N T tous nos Roys ses successeurs, cōme ils ont honoré les bons Prelats, aussi ont-ils desiré retrancher, tuer, & brusler les testes des Amphibenes Gaulois, sçauoir les simonies & pluralitez beneficiales: Pluralitez totalement abominables, estant raisonnable que comme les mondains ne peuuēt auoir qu'une seule & legitime espouse, que les Ecclesiastiques aussi n'ayent qu'un seul Benefice.

Les troubles estrangers, les partialitez entre les

Grands de ce Royaume, les heresies semees eniceluy par les impies, ont causé que tous ces pieux Roys n'ayent suffoqué ces Hydres Diplees.

Si le Grand HENRY iadis pere commun de vous & de nous venoit à tenir les resnes de cest Empire, vostre Majesté verroit comme d'un premier abbord il appliqueroit le fer à ces maux, qui sont plus que contagieux à cest Estat: Iedis qu'il feroit démettre par le Pape les meschans Simoniaques & confidentaires Prelats. Au contraire feroit esleuer par le mesme S. Pere les bons & pieux Ecclesiastiques aux Dignitez sacerdotales: Coupant racine à la paillardise, richesse, rapine, sacrileges, & auarice de nos Euesques François.

Il semble que le Dieu des armées vous ait maintenant destiné pour cest effect: Employez-y toutes vos forces, & comme vn petit Dauid il vous rendra victorieux sur ses ennemis.

VOSTRE Clemence ne doit s'estendre d'auantage à laisser ramper ces maux par la France; estant necessaire que la seuerité Chrestienne les en exterminet. L'honneur & l'hommage que deuez à celuy qui vous a mis le Sceptre en main, vous le commande; le peuple vous y inuite; les bons vous y conuient; l'Eglise vniuerselle vous y exhorte. N'y manquez, Grand Roy: & vous verrez qu'au lieu du Calvinisme, l'Eglise Catholique Apostolique & Romaine florira, la Iustice s'observera, le peuple vous aimera; en fin chacun à qui mieux mieux, poussé d'une emulation toute sainte, ne souspirera, respirera & aspirera avec vous qu'au sejour empiree.

Le sacré nom de LOVYS, les blancs Lys que portez pour vos armes, les prerogatiues qu'avez du premier fils de l'Eglise, me donnent vne asseuree esperance que mettrez ordre à telles miseres: Ioindrez quant-
&-quant

& quant au culte diuin & abolition des meschans Ecclesiastiques, vne sainte reformation sur ceux qui representent vostre Majesté pour rēdre Iustice à vn chacun, ne font que tournoyer en Giraudolines; & faire toutes especes d'iniustices.

VOYEZ donc, SIRE, comme la nef de ce Royaume est tourmentee: seruez-luy de phare, & elle n'ira le heurter en fracas sur le caphare rocher de perdition.

ELLE ne pourra à la verité se perdre, ie dis tout ce Royaume eschauffé des rayons du Soleil angelique, enrichi du culte diuin, diuinisé par la Iustice, chassera du sein de sa Republique les Iuges iniustes & auaricieux.

LE Sage des Roys & le Roy des Sages Salomon estime que le Iuge qui aime les richesses ne sera iamais innocent, mais bien fera perdre l'Empire où il sera. Dire digne d'auoir esté proferé par vn tel Sage: parce qu'il ne se peut faire que la Iustice, qui est (selon le terme d'Hesiodé) vne vierge toute pure, compagne d'vne honneste Pudeur, mere & royne de toutes vertus, puisse subsister dans des ames aides de lucre & de presents.

PLATON en sa Republique appelle les Iuges d'vne telle estoife, Bourdons & Brochets: d'autant que comme les Bourdons corrompent le miel, & les Brochets mangent les autres poissons: De mesme aussi tels Iuges ostent à la Iustice sa beauté, & deuorent le bien des veufues & orphelins.

LETRO conseilla à Moysé chef du peuple d'Israël, de luy donner des Iuges, ie dis des Iuges qui craindroient Dieu, aimeroient la verité, & abhorreroient l'auarice: tels hommes deuant estre tous celestes. Car comme pourront-ils donner à vn chacun ce qui luy appartient, si poussez d'vne fraude diabolique ils ont desir sur le bien d'autruy?

ANCIENNEMENT en Egypte, Royaume autant reuefche & eſtrange qu'il eſtoit poſſible, le premier Iuge de leur Senat portoit en ſon col l'image de la verité: Ce que, au rapport d'Amman Marcellin, nos Druides par apres ont effectué: hieroglyphe qui leur repreſentoit comme toute leur ambition ne deuoit iamais eſtre autre, que iuger veritablement, ſans attrait d'aucun profit, la cauſe d'autrui.

A LA mienne volonté que nos Iuges euſſent à l'imitation de ces pauvres Payens tellement graué dans leurs cœurs l'image de ceſte verité, que ſincerement ils iugeaſſent des differends de vos ſubiets.

LA Table ſuspenduë par deux chaînons qui alloit battre ſur le cœur du grand Pontife de l'ancienne loy, appellee par les Hebrieux *Eri*, c'eſt à dire vniuers, ne vouloit ſignifier autre choſe ſinon que celui qui auoit à iuger des actions d'autrui, deuoit avec toute iuſtice & verité, ſans crainte, hypocriſie, auarice, acception de perſonne, & leſion aucune de ſon ame, dire & donner ſes arreſts: Choſe qui ne ſe pratique nullement pour le iour d'huy. Car qui iuge pouſſé d'une extreme paillardie, à la faueur d'une Dame qui le poſſedera: qui ſelon ſon auarice (corrôpu qu'il ſera par preſents) fera gagner la cauſe iniuſtement à celui qui n'aura point de droit: qui ambitieufement deſireux d'eſtre bien en cour auprés de quelque Prince, raura le bien des pupilles: Bref la plus grande corruption qui iamais ait eſté au monde eſt auourd'huy dans les ames de la plus grande partie des Iuges François.

LA cauſe de cela c'eſt la venalité & achapt des Eſtats de Iudicature, les Iuges vendans en detail ce qu'ils ont acheté en gros.

Le premier Empereur Chreſtien, i'appelle Conſtantin, eſtimoit tellement les bons Iuges, qu'il ne leur

disoit autre chose, sinon que comme il rapportoit toutes ses victoires & triomphes à la croix de I E S V S-CHRIST, ils dressassent aussi toutes leurs actions à la Iustice, obseruans ce precepte diuin, *Gratuitement donnez ce que gratuitement, à cause de la Iustice qu'on a recogneue estre en vous, vous auez receu.*

PHILIPPE Roy de Macedoine auoit bonne grace, quand il fit construire vne cité qu'il nomma *Penecropolis*, en laquelle il fit enclore tous les meschants Iuges, & autres scelerats de son Royaume: d'autant qu'il auoit peur qu'ils n'infectassent du venin de leur iniustice, & ses subiets & ceux mesmes des Empires circonuoisins.

HELAS! SIRE, combien de villes faudroit-il que vous fissiez baltir, si elle vouloit tirer de chacune cité & les mauuais Iuges qui y sont, & ceux qui à leur exemple font mille rapines, larcins & extorsions sur vostre pauvre peuple?

FAICTES renouueller l'election pour les Iuges selon la loy fondamentale de Charles le grand, sçauoir que l'on elise des bons, veritables & clements Magistrats. Alors ceux qui sont és champs Elysiens se jouyront avec vous de la moderation d'une si florissante Monarchie.

I'AY tousiours admiré pourquoy les anciens depeignoient la Majesté Royale vestuë d'un manteau tissu & empourpré de toutes sortes de fleurs, mais d'une principalement qui subsistante par le milieu tenoit tous les autres sous ses fleurons. Maintenant ie fors d'estonnement, considerant que comme la Royauté est remplie de toutes vertus, elle doit auoir sur toutes en recommandation la Iustice, Iustice laquelle à la façon de la rose croist, fleurit & garde son odeur à perpetuité.

L'ORATEUR des plus grands, & le plus grand des Orateurs Ciceron, cognoissant par ombrage ce qui est de la Iustice, hautement s'escrie qu'on ne peut rien faire de bon si elle n'honore nos œuvres de sa presence.

PLVS eloquemment & saintement l'Apostre S. Paul va disant, lors qu'il parle de nos œuvres, que si elles ont esté iustes elles nous iustifieront, n'y ayant rien qu'une Iustice qui nous inthronisera sur le Throsne sacré de la diuinité.

LA Iustice de laquelle nous parlons est celle que l'Eloquence Grecque (i'entends Demosthene) dit qui ne s'achete ny par or ny par argent, mais qui par la gloire qu'elle a de rendre le droict à vn chacun s'insinué dans l'ame des bons pour s'y placer.

HOMERE auparauant ce fameux Demosthene cognoissoit comme vn esprit remply d'un doux entousiasme qu'il estoit, que celuy qui sans fard est honoré de telle vertu est semblable à ce grand Iupiter qui donne estre, vie, tour, contour, mesure, rapidité & mouuement à toutes choses.

L'ELEGIAQUE Latin lors qu'il parle du cataclisme & inondation vniuerselle, feignant sans feindre dit gallemment que Deucalion & Pyrrha firent sacrifice à la Deesse Themis pour remettre le mode en son premier estat, n'y ayant rien qui iette les vices hors de ce microcosme (i'appelle l'homme) que la seule Iustice: pourautât que luy representât ses iniustices, elle luy fait recognoistre sa beauté & sa candeur quand il est iuste.

L'HONNEUR des Mantuens (i'entends Virgile) conformément à la parole sacree de **IESVS-CHRIST**, ne nous exhorte à autre chose pour auoir le chef entouré d'un laurier doré (ie dis d'immortalité) que nous ayons à apprendre à rendre l'honneur, reuerence & culte à Dieu que nous luy deuons, puis auctoriser nos saints

D'une sainte & diuine Iustice.

O IUSTICE que tu deuerois estre honoree ! puis que compagne de la Deité que tu es tu nous armes du bouclier de la foy, nous appuyes sur la colonne de la verité, & nous pose au tabernacle solemnel de l'éternité. Donne nous, donne nous des hommes que tu aimes & qui t'aiment, afin que ta grandeur recogneue par iceux ils te rendent plus admirable que iamais.

P O U R rendre plus admirable il faut à l'imitation del'Aucteur de nostre salut chasser hors de ton Temple ceux qui vendent, achètent, & briguent par presens tes Dignitez & Offices; estant vn enorme sacrilege de faire trafic d'une chose si diuine.

N O N sans cause Iustinian a asseuré que tels achats & venalitez estoient les commencemens de l'impieté qui alloit se semer par l'Empire sacré des Romains.

L E S Empereurs Theodose & Valentinian cognoissans le mal qu'une telle marchandise apporteroit à leurs Empires, sur peine de priuation d'office, ne voulurent permettre qu'aucun fust esleué sur le saint Tribunal de la Iustice, qui auroit non seulement donné, mais bien qui auroit eu la volonté de bailler ou promettre argent à ceux qui l'auroient faict mōter au throsne de Iustice.

L E S Areopages considerans quelle vertu deuoient auoir les Iuges, n'en receuoient iamais vn en leur Senat qui n'eust donné au prealable à tout le monde l'espace de quarante ans vn tesmoignage certain de son integrité, faisans telle honte à ceux de leur compagnie qui se laissoient corrompre par argent, qu'ils les expulsoient de leur conseil, & les condamnoient à de grosses amendes.

V R A Y E M E N T les meschans Iuges doiuent estre rigoureusement chastiez.

C A M B Y S E S Roy autant magnanime que iuste, fit

publier par tout le pays des Perſes, que l'on n'eust iamais à eſlire vn Iuge qui laiſſaſt offuſquer la ſplendeur de ſa reputation par les nuages des preſens, or, argent, & autres metaux, eſtans vrais elemens de meſchanceré. Pour ce en fit eſcorcher vn tout viſ, & mettre ſa peau tout au hant du tribunal de ſon ſils, afin que regardant comme ſon pere auoit eſté puny à cauſe de ſon iniuſtice, la meſme peine luy ſeroit donnee ſ'il ne viuoit en ſon Eſtat avec incorruption.

DARIVS ſucceſſeur de Cambyſes long temps apres fit pendre vn Iuge, qui gagné par preſens auoit rendu iniuſtice à vn pauvre homme.

LE Dieu des viuans maudit par ſon Prophete Eſaye tous les Iuges corruptibles, & ne leur donne vne ſentence de mort mondaine, mais bien d'une eternelle dans le profond des enfers.

LES Loix Imperiales & Royales Conſtitutions de quelques Roys que ce ſoit puniſſent de mort tous ceux qui meſchamment iugent autrui.

L'EMPEREUR Alexandre Seueré commanda par ſes Loix que l'on fiſt mourir cruellement les corruptibles Iuges.

LES Roys François ont fait le meſme. Ce que vous deuez cōmander eſtroitemēt: autremēt tout ſe perdra.

LES Turcs, bien que Mahometans & endiablez, deſendent neantmoins en leur Alcoran que l'on n'aye à eſlire des Iuges iniques, voulants que l'on empale à la face de tout le peuple ceux qui auront commis iniuſtice en leur charge.

I'IROIS à l'infiny ſi ie voulois mettre en ieu comme par tous les Empires & Monarchies ceux qui ſont appelez aux Magiſtrats de Iudicature doiuent eſtre eſleus: puis ſ'ils manquent à rendre ſainctement la Juſtice, doiuent eſtre exemplairement punis de mort.

TOUT ainsi, SIRE, que vostre Majesté doit estre seuerre enuers les Iuges iniques: De mesme se doit-elle comporter enuers les vaultours du peuple (ie dis les Financiers.)

Ce sont eux qui minent vostre France, qui peruertissent & les Iusticiers, & la Iustice, qui pillent & detournent la substance des pauvres: Pauvres qui n'ont autre recours qu'à la clemence & vengeance de Dieu: Dieu qui les regardant en pitié, heurte maintenant à la porte de vostre ame, pour faire en sorte que les soulagiez, comme les membres principaux du corps de vostre France.

REMEDIEZ, SIRE, à vn si grand mal, & confidez les benedictions que vous aurez tant du grand Dieu que des hommes, si vous appliquez le fer brulant à ceste gangrene de Financiers.

Je souhaiterois que ce monstre n'eust qu'une teste, afin que d'un coup on le peust faire mourir. C'est ce monstre prodigieux qui a faict & fera faire mille reuoltes par toutes les Royautez du monde. C'est ce serpent basilic qui de sa veüe estouffe les enfans des grands Royanmes. C'est cest Hemorrois qui apres auoir mordu le pauvre peuple, luy tire tout le sang, puis le brusle; en fin le tourmentant d'une soif estrange le suffoque.

GALEMENT celuy là accompare les gabeleurs financiers au sommeil: car comme le sommeil oste la moitié de la vie à l'homme: aussi la taille que l'on leue sur le peuple luy tire, oste & emporte la moitié, voire toute la commodité qu'il a de viure.

EN la Loy de Dieu tant ancienne qu'Euangelique, comme sont maudits telles especes d'harpies? Chez les Turcs & autres infideles comme les chastie-on? Ce ne sont que supplices, empalemens, rouës & flammes. Il n'y a que dans la France où l'on tollere la morsure de ces aspies.

TOUTES les conquestes des Roys François, qui ont esté si grandes que le resultat en est allé du pole Arctique à l'Antarctique, cōme ont-elles esté faictes, sinon par le secours que leur peuple, franc & libre de subsides, tailles & gabelles, leur donnoit?

Nos Annales ne nomment nos Roys pour cest effect qu'Augustes, saints, & Peres du peuple.

LA bien-veillance du peuple enuers nos Roys a esté le puiot de nostre Monarchie. La douceur de nos Roys enuers leur peuple reciproquemēt a esté la grandeur de cest Empire. Empire qui semble aller en decadence, veu que le peuple n'a personne qui vous tesmoigne la necessité, misere & famine qu'il y endure: le tout à cause des larcins, cōcussions, & gabelles de vos Financiers.

L'ITALIE, l'Espagne, la Turquie, & beaucoup d'autres clymats estrangers peuplez maintenant de vos François, en font foy.

ILs quittent leur pays natal, leur tant bon Royaume, leur si douce mere, pour ne pouuoir plus viure. (les loups rauissans de Financiers leur ostant leur pain.) Ils ne couchent plus que sur la dure, ne mangent que des racines, ne sont vestus que de haillons; bresn'ont plus rien ny pour se soulager, ny pour vous secourir si l'occasion estoit telle qu'il y eust de la guerre estrangere.

ADVISEZ-Y DONC, SIRE, & commencez à faire servir Dieu en ce Royaume, chastier les meschans Ecclesiastiques, Juges, & Financiers. Et vous verrez comme le torrent de la grace divine se desbordera de tous costez sur le parterre de vostre Royaume. A CE suiet de toute l'estendue de mon ame ie prie le Roy des Roys qu'il verse sur vostre chef la rosce sacrée de son amour: afin que l'aimant vous aimiez son Eglise, faciez rendre gratuitement la Justice à vn chacun, & en fin soulagiez, ostiez & releuiez son pauvre peuple des malheurs où les subsides extremes le reduisent.

FIN.

